

# La valur da la lavur parlamentara

## Pled d'avertura per la sessiun d'avust

■ **(anr/fa) Il pled d'avertura da l'emprima sessiun cun il parlament novelegi per la perioda d'uffizi 2018–2022 ha tegnì la presidenta seniora Nicoletta Noi-Togni. Ella ha tematisà la pussanza ch'è colliada cun la lavur en il cussegl grond.** Ils 10 da zercladur è vegnì elegì e reelegì il parlament chantunal. En ses pled d'avertura ha la presidenta seniora *Nicoletta Noi-Togni* (independenta, Roveredo) salidà spezialmain ils 50 deputadas e deputads novs en il cussegl grond: «Igl è in di d'allegria da pudair esser qua en la sala dal parlament, suenter esser vegnids elegids u reelegids dal suveran grischun», ha ella ditg, «nus ans sentin perquai impurtants, pussants.» Els nun hajan dentant en sasez nagin merit

per il privilegi dad esser naschids en in pajais uschè bel, liber e democratic, ha punctuà la deputada da la Val Mesolcina, «ma gist questa conscienza da la pussanza limitada ans duess motivar da surpigliar la responsabladad envers il pajais ed ils abitants.» Sco che Noi-Togni ha accentuà saja impurtant che las differenzas entaifer il chantun vegnian respectadas. Ella ha era tematisà las valurs da la lavur parlamentara. «Nus stuain ans sfadiar da procurar tant sco pussaivel che nosa lavur en il cussegl grond saja libra d'interess persunals, ch'ella saja efficazia e ch'ella giaja mo a favur da la chaussa e betg da la politica u da la partida», ha ditg la deputada independenta. Cun quels plects ha ella avri la legislatura 2018 fin 2022.



Saramentaziun da las novas deputadas e dals novs deputads..